




კავკასიის ეკონომიკის ყოველთვიური
მიმოხილვა
იანვარი 2024





ეკონომიკური ზრდა



2023 წლის პირველი თერთმეტი თვის მდგომარეობით, კავკასიის ეკონომიკის ზრდა 4%-ია. 2022 წელს კავკასიის ეკონომიკური ზრდა 7.8%-ს აღწევდა. ეკონომიკური ზრდის ტემპის კლება რუსეთიდან ადამიანური და ფინანსური კაპიტალის ნაკადების შემცირებასა და წინა წელთან შედარებით, ნავთობის დაბალ ფასებს უკავშირდება.


✚ გასული წლის პირველ თერთმეტ თვეში საქართველოს ეკონომიკა 6.4%-ით გაიზარდა, ხოლო ნოემბერში ზრდის ტემპი 5.9%-ს შეადგენდა. ზრდაში მნიშვნელოვანი წვლილი საფინანსო, სავაჭრო, პროფესიული და სამშენებლო სექტორებმა შეიტანეს. კლების ტენდენცია დაფიქსირდა დამამუშავებელი მრეწველობის, ენერჯეტიკის და ტრანსპორტის სექტორებში.

🇧🇪 კავკასიის რეგიონში ზრდის ყველაზე მაღალი ტემპით სომხეთი გამოირჩევა. გასული წლის პირველ თერთმეტ თვეში სომხეთის ეკონომიკა 9.4%-ით გაიზარდა. უშუალოდ ნოემბერში, წინა წლის იმავე თვესთან შედარებით, ეკონომიკა 11.2%-ით გაფართოვდა. სომხეთის ეკონომიკურ ზრდაში განსაკუთრებული წვლილი სავაჭრო სექტორს აქვს, რომელმაც ამ პერიოდში 23.3%-ით მოიმატა, ხოლო სამშენებლო დარგმა კი - 15.6% -ით.

🇦🇲 რეგიონში ზრდის ყველაზე დაბალი ტემპი აზერბაიჯანში დაფიქსირდა. 2023 წლის პირველ თერთმეტ თვეში აზერბაიჯანის ეკონომიკა 0.8%-ით გაიზარდა. აზერბაიჯანის ეკონომიკის 37.8% ნავთობისა და გაზის ინდუსტრიას უკავია. ენერჯორესურსების ფასი, 2022 წლის ანალოგიურ პერიოდთან შედარებით, შემცირებულია. ნავთობისა და გაზის ინდუსტრიის გარეშე ზრდის მაჩვენებელი 3.2% იყო.



ინფლაცია და მონეტარული პოლიტიკა



ინფლაციის მაჩვენებელი კავკასიის რეგიონში ეკონომიკური ზრდის ტენდენციებს იმეორებს. საუკეთესო მდგომარეობა სომხეთშია, ხოლო ყველაზე ცუდი მაჩვენებელი აზერბაიჯანში ფიქსირდება.

საქართველოში 2023 წელს ინფლაციის ტემპი, წინა წელთან შედარებით, შემცირებული იყო. დეკემბერში სამომხმარებლო ფასების წლიურმა ზრდამ 0.4% შეადგინა. დეკემბრის ინფლაციაში მაღალი წვლილი ტრანსპორტის ფასებმა შეიტანა, რომელიც 5.1%-ით გაიზარდა. თუმცა, რიგ სექტორებში ფასების კლება დაფიქსირდა, მათ შორის, ჯანდაცვის სერვისების ფასები ყველაზე მეტით, 3.8%-ით - შემცირდა. ამ ფონზე, ცენტრალურმა ბანკმა ბოლო გადაწყვეტილებით რეფინანსირების განაკვეთი 9.5%-მდე შეამცირა.

რეგიონში ყველაზე დაბალი ინფლაციით სომხეთი გამოირჩევა. გასული წლის დეკემბერში სამომხმარებლო ფასების წლიური კლება 0.6% იყო. ყველაზე მაღალი, 8.4%-იანი ზრდა ალკოჰოლისა და თამბაქოს ჯგუფში დაფიქსირდა, ხოლო 4.8%-იანი კლება სურსათის ფასებზე. ეს კი სამომხმარებლო ფასების ძირითადი ნაწილია. სომხეთის ცენტრალურმა ბანკმა მონეტარული პოლიტიკის შემსუბუქება 2023 წელს დაიწყო. ბოლო გადაწყვეტილებით, რეფინანსირების განაკვეთი 9.25%-მდე შემცირდა.

აზერბაიჯანში ინფლაციის ტემპი, კლების მიუხედავად, შედარებით მაღალ ნიშნულზე რჩება. 2023 წლის დეკემბერში სამომხმარებლო ფასების წლიურმა ზრდამ 2.1% შეადგინა. ნოემბერში ინფლაცია 2.6% იყო. აზერბაიჯანი რეგიონში შედარებით მაღალი ინფლაციით წინა პერიოდებშიც გამოირჩეოდა. მიუხედავად ამისა, აზერბაიჯანის ცენტრალური ბანკი პოლიტიკის გამკაცრებისგან თავს იკავებს. მეტიც, დეკემბრის ბოლოს, მონეტარული პოლიტიკის განაკვეთი 8%-მდე შემცირდა.